

四庫全書

經部

欽定四庫全書

經部

五禮通考卷五十八

詳校官監察御史臣范衷

給事中臣溫常綬覆勘

總校官進士臣繆琪

校對官中書臣吳紹昱

謄錄監生臣程元鼎

欽定四庫全書

五禮通考卷五十八

刑部尚書秦蕙田撰

吉禮五十八

宗廟制度

蕙田案天子宗廟之制三昭三穆與太祖之廟而七蓋自虞夏以來商書云七世之廟可以觀德其明証也周監二代制度益昭凡桃

遷宗祖以暨宮室服冕籩豆尊壘牲牢器數
樂舞之制散見于儀禮周官戴記者雖不無
闕略然皆有脈絡可尋推類以求聖人制作
之精意穆然可思也今詳其條目統爲制度
列于時享之前各家異同之說略爲考定至
律呂本通貫祭祀之樂因廟享最詳並附著
焉

易萃卦萃亨王假有廟

注假至也王以聚至有廟也
疏王假有廟者天下崩離則民

怨神怒雖享祀與無廟同王至大聚之時孝德乃洽始可謂之有廟矣故曰王假有廟

程傳王者萃聚天下之道至于有廟極也羣生至衆也而可一其歸仰人心莫知其鄉也而能致其誠敬鬼神之不可度也而能致其來格天下萃合人心總攝衆志之道非一其至大莫過於宗廟故王者萃天下之道至于有廟則萃道之至也祭祀之報本于人心聖人制禮以成其德耳故豺獾能祭其性然也本義萃聚也廟所以聚祖考之精神又人必能聚已之精神則可以至于廟而承祖考也程子曰萃渙皆立廟因其精神之萃而形于此爲其渙散立廟以收之

張氏浚曰巽木在上爲有廟

朱氏震曰艮爲門闕巽爲高上爲宗廟

李氏過曰宗廟者人心所係武王伐商載車以行係人心也

趙氏汝祿曰天下主王者以聚其生王者主宗廟以聚其民君子將營宮室宗廟為先有廟者萃人心之本龔氏煥曰假字疑當作昭假列祖之假謂感格也王者致祭于宗廟以己之精神感格祖考之精神也沈氏起元曰王假有廟玩象辭有字最重觀渙大象先王以享于帝立廟可見有廟者立廟之謂假字訓至為是

蕙田案注疏訓假為至原本渙大象立義似

更平實有關係

象下傳王假有廟致孝享也

陸氏希聲曰氣聚而生氣散而死魂氣游散無所依歸故聖人于萃聚之時立宗廟以致孝享

吳氏澄曰致者至其極也極盡孝享之道乃能萃已散之精神也

雷氏次宗曰得萬國之歡心四海之內各以其職來祭然後可以謂之有廟而致孝享此謂天子之孝

渙卦渙亨王假有廟

疏王假有廟者王能渙難而亨可以至于建立宗廟故曰王假有廟

也

本義渙散也祖考之精神既散故王者當至于廟以聚之

胡氏炳文曰萃與渙皆五艮艮為門闕一陽在上為屋二陰在下為闕高巍之象故曰有廟萃言假廟是言聚已之精神以聚祖考之精神渙言假廟是祖考之精神既散至于廟所以聚之

朱氏震曰上爲宗廟艮爲門闕五王位九五有入自門闕至于廟之象

彖下傳王假有廟王乃在中也

注王乃在乎渙然之中故至有廟也疏此重

明渙時可以有廟之義險難未安方勞經略今在渙然之中故至于有廟也

程傳王假有廟之義在萃卦詳矣天下離散之時王者收合人心至于有廟乃是在其中也
其中攝其心之謂也中者心之象

本義中謂廟中

楊氏繪曰當渙之時何以御之王者定中而正位託天地宗廟之靈以固民之離心故曰王假有廟王乃在中也鄭氏汝諧曰方其渙也孰爲君孰爲臣至于有廟則王位乎中而上下定矣

張氏栻曰收天下之心莫若立宗廟而正王位
王乃在中所謂中天下而立定四海之民也

何氏楷曰王乃在中者非在廟中之謂王者之心渾
然在中則不薦之乎直有出于儀文之外者宜其精
神之與祖考
相為感格也

蕙田案在中楊氏鄭氏爲是

象下傳風行水上渙先王以享于帝立廟

疏先王以渙然無難之時

建立宗廟以祭祖考

程傳風行水上有渙散之象先王觀是象收天下之
渙散至于享帝立廟也收合人心无如宗廟祭祀之
報出于其心故享帝立廟人心之所
歸也係人心合離散之道無大于此

本義皆所以合其散

項氏安世曰立廟于宮象坎之隱

朱氏震曰立廟則人知反本鬼有所歸所以一天下之心合天下之渙

丘氏富國曰鬼神之道幽深渺邈不可度思惟至誠貫徹潛乎冥感如水之遇風渙然相受則陰陽交通有合无間廟焉而神鬼享矣

俞氏琰曰渙泮渙也風來水面而水有文故曰渙風無形无所寓則无以見之水動成文後見風之至鬼神亦無形者立廟于宮而後人鬼享有所寓故也

詩小雅巧言奕奕寢廟君子作之

疏連言寢廟者周禮註云前曰廟後曰寢

則寢廟一物先寢後廟便文耳此自工匠所造而言君子者闕宮曰新廟奕奕奕斯所作彼奕斯君子也以教護課程必君子監之乃得依法制也

春秋桓公二年左氏傳清廟茅屋

周禮春官大宗伯掌建邦之人鬼之禮

小宗伯掌建國之神位左宗廟

注庫門內雉門外之左右

王氏昭禹曰左陽也人道所尚君子于其親事死如事生故左宗廟

鄭氏鍔曰匠人云左祖右社匠人所掌者營作之事小宗伯所主者辨其方位也

考工記匠人營國左祖右社

注左宗廟疏案祭義注云周尚左桓二年取郕大

鼎納于太廟何休云質家右宗廟尚親親文家左宗廟尚尊尊

陳氏禮書周官小宗伯禮記祭義皆曰建國之神位
右社稷左宗廟考工記匠人營國左祖右社蓋宗廟
陽也故居左陽故宗廟皆南嚮廟所以象王之朝而
朝必南面則廟皆南嚮可知聘禮賓入大門內公揖
入每門每曲揖然後及祖廟司儀諸公相爲賓及將
幣三揖三讓每門止一相然後及廟賈公彥曰入大
門東行至廟

考之于禮諸侯之廟左闕門內先儒皆謂在大門內

其間有每門

者諸侯五廟祖廟位居中東二昭廟西二穆廟各有門門之旁有牆牆之中夾通門則祖廟以西閣門者三東行而歷三門及至祖廟則廟皆南嚮矣廟皆南嚮而昭南面穆北面者禘祫之位也晉孫毓曰宗廟之制外爲都宮內各有寢廟別爲門垣太祖在北左昭右穆次而南蓋其所傳聞者異也

禮記曲禮君子將營宮室宗廟爲先

注重先祖

馬氏晞孟曰太王之遷豳也作廟奕奕然後百堵皆興宣王是考室也似續妣祖然後作室百堵則古人

之營宮室者豈有不先宗廟者哉
檀弓曰喪不慮居爲無廟也

祭義宰我曰吾聞鬼神之名不知其所謂子曰氣也者神之盛也魄也者鬼之盛也合鬼與神教之至也衆生必死死必歸土此之謂鬼骨肉斃于下陰爲野土其氣發揚于上爲昭明焄蒿悽愴此百物之精也神之著也因物之精制爲之極明命鬼神以爲黔首則百衆以畏萬民以服聖人以是爲未足也築爲宮室設爲宗祧以別親疎邇教民反古復始不忘其所由生也衆之服

自此故聽且速也

疏此經明聖人爲鬼神立宗廟之事聖人以尊名鬼神爲未足稱其意故

爲宮室宗祧以別親疎遠邇教民反古復始也古謂先祖追而祭之是反古也始謂初始父母始生于己今追

祭之是復始也追遠報祭是不忘其所由生也

劉氏彛曰所以別其親疎者立祖禰之名也所以辨其遠邇者定宗祧之數也教民尊祖以時祭之故曰

反古也教民親禰以禮敬之故曰復始也不忘其所由生者其謂此乎

慕容彦達曰親而邇者爲宗疎而遠者爲祧此宗祧所以別親疎遠邇也廟有寢祧無寢廟則修除祧則黜陟此宮室所以別親疎遠邇也祧則以教反本之道也祖則以教反始之道也禰則以教不忘其所由生也民德齊厚而不忘其本其服也出其中心之誠非有強之而爲也

祭法天下有王分地建國置都立邑設廟祧壇墀而祭之乃爲親疎多少之數是故王立七廟一壇一墀曰考廟曰王考廟曰皇考廟曰顯考廟曰祖考廟皆月祭之遠廟爲祧有二祧享嘗乃止去祧爲壇去壇爲墀壇墀有禱焉祭之無禱乃止去墀曰鬼

蕙田案祭法非宗廟正禮詳見後茲取其廟名存之

曲禮祭王父曰皇祖考王母曰皇祖妣父曰皇考母曰

皇妣夫曰皇辟

呂氏大臨曰宗廟祭祀尊而神之有君道焉故皆曰皇也君亦曰辟則臣之所取法也

陳氏祥道曰詩曰皇皇后帝又曰皇王維辟天王而臣子加之以帝尊之與天同故也祖父死而子孫加之以皇夫死而妻加之以辟尊之與君同故也周官大祝所謂鬼號此也

陳氏澔曰曰皇曰王皆以君之稱尊之也考成妣嬭辟法也妻所法式也爲之宗廟以鬼享之不得不異其稱謂也

曲禮措之廟立之主曰帝

注立主曰帝同之天神疏卒哭竟而祔置于廟立主使

神依之崔靈思曰廟主曰帝蓋是爲祀時有主入廟稱帝之義記者錄以爲法也

呂氏大臨曰措之廟曰帝者祔于廟之詞也周人卒哭而祔殷人練而祔祔而作主始入于廟曰帝者同于天神生事畢而鬼事始也鬼神莫尊于帝以帝名之言其德足以配天也然考之禮經未見有以帝名者惟易稱帝乙亦不知其何帝獨司馬遷史記載夏殷之王皆以帝名疑殷人祔廟稱帝遷據世本而言當有所考至周有謚始不稱帝

禮運祖廟所以本仁也

孝經爲之宗廟以鬼饗之

注立廟祔廟之後則以鬼禮享之疏立廟者即禮記祭

法天子至士皆有廟

尚書大傳廟者貌也以其貌言之也

爾雅釋名宗尊也廟貌也先祖形貌所在也寢寢也所
寢息也

釋宮室有東西廂曰廟無東西廂曰寢

家語孔子曰吾于甘棠見宗廟之敬也甚矣思其人猶
愛其樹尊其人必敬其位道也

白虎通聖人所以制宗廟何生死殊路故敬鬼神而
遠之所以有屋何所以象生之居王者立宗廟何
緣生以事死敬亡若事存欲立宗廟而祭之此孝子

之心所以追養繼孝也

孝經援神契宗廟所以尊祖也

右宗廟名義

書舜典正月上日受終于文祖

傳文祖者堯文德之祖廟正義禮有大事行

之于廟況此是事之大者知文祖者堯文德之祖廟也且下云歸格于藝祖藝文義同知文祖是廟者咸有一德云七世之廟可以觀德則天子七廟其來自遠堯之文祖蓋是堯始祖之廟不知爲誰也帝繫及世本皆云黃帝生元囂元囂生僑樞樞生帝嚳帝嚳生堯即如彼言黃帝爲堯之高祖黃帝以上不知復祭何人充此七數況彼二書未必可信堯之文祖不可強言

林氏之奇曰薛氏云受天下于人必告于其人之所從受者此論當矣然而所祖之人不可得而知也祭法曰有虞氏禘黃帝而郊嚳祖顓頊而宗堯舜典大禹謨皆虞書也既是虞書則所稱祖宗必自虞世言之祖宗即堯也神宗爲堯則文祖亦可指爲顓頊然而去古遠矣不可以爲必然之論

歸格于藝祖用特

傳告至文祖之廟藝文也言祖則考

此以告至文祖之廟才藝文德其義相通故藝爲文也文祖藝祖史變文耳此時舜始攝位未自立廟故知告堯之文祖也

月正元日舜格于文祖

傳舜服堯三年喪畢將即政故復至文祖廟告

三載之下故知舜服堯喪三年畢將欲即政復至文祖廟告前以攝位告今以即政告也此猶是堯之文祖自

此以後舜當自立文祖之廟堯之文祖當遷于丹朱之國也

大禹謨正月朔旦受命于神宗

傳受舜終事之命神宗文祖之宗廟言神尊之

正義舜典說舜之初受終于文祖此言若舜之初知受命即是舜終事之命也神宗猶彼文祖故云文祖之

宗廟文祖言祖有文德神宗言神而尊之名異而實同神宗當舜之始祖案帝繫云黃帝生昌意昌意生顓頊顓頊生窮蟬窮蟬生敬康敬康生勾芒勾芒生螭牛螭牛生瞽瞍瞽瞍生舜即是舜有七廟黃帝爲始祖則文祖爲黃帝顓頊之等也

蔡傳神宗堯廟也蘇氏曰堯之所從受天下者曰文

祖舜之所從受天下者曰神宗受天下于人必告于

其人之所從受者禮曰有虞氏禘黃帝而郊嚳祖顓
頊而宗堯則神宗爲堯明矣

陳氏師凱曰祭法疏云有虞氏以上尚德禘郊祖宗
配用有德者而已虞氏禘郊祖宗之人皆非虞氏之
親是尚德也自夏以
下稍用其姓代之

時氏瀾曰神宗堯也天下者堯之
天下受命于神宗示不敢專也

吳氏澄曰祭法必有所據舜受堯之天下今以授禹
其宗堯爲宜或謂舜不當立堯廟然堯與舜皆黃帝
之後其宗
堯何嫌

益稷夔曰曼擊鳴球搏拊琴瑟以詠祖考來格虞賓在

位羣后德讓下管鼗鼓合止祝敔笙鏞以間鳥獸蹌蹌

簫韶九成鳳皇來儀

正義此舜廟堂之樂謂廟內堂上之樂言祖考來格知在廟內下云

下管知此在堂上也馬融見其言祖考遂言此是舜除
瞽瞍之喪祭宗廟之樂亦不知舜父之喪在何時也但
此論韶樂必
在即政後耳

中庸舜其大孝也與宗廟饗之

國語魯語有虞氏禘黃帝而祖顓頊郊堯而宗舜 幕

能率顓頊者也故有虞氏報焉

禮記祭法有虞氏禘黃帝而郊嚳祖顓頊而宗堯

疏案聖證

論以此禘黃帝是宗廟五年祭之名虞氏之祖出自黃
帝顓頊是虞帝七世祖以顓頊配黃帝而祭是禘其祖
之所自出以
其祖配之

趙氏匡采曰虞氏禘黃帝蓋舜祖顓頊出于黃帝則
所謂禘其祖之所自出也郊嘗者帝王郊天當以始
祖配天則舜合以顓頊配天也爲身繼堯緒不可捨
唐之祖故推譽以配天而舜之世系出自顓頊故以
爲始祖情
禮之至也

周氏諤曰舜之受禪止于一世故就舜
之身而言之則不得不郊嘗而宗堯

方氏慤曰帝公天下者也王家天下者也有虞氏所
郊所祖不皆祖嘗睦之親而祖堯之親者凡以爲公
而已而

楊氏復曰黃帝生昌意昌意生顓頊顓頊生窮蟬窮蟬至瞽瞍皆微爲庶人舜嗣帝位以帝顓頊爲祖廟黃帝者帝顓頊之所自出也故禘黃帝于帝顓頊之廟而以帝顓頊配之也帝嚳堯之父也顓頊舜之祖也有虞氏當以帝顓頊配天爲身嗣堯位故推帝嚳以配天而以顓頊爲祖仁之至義之盡也顓頊虞氏異代之祖以功德而祖之有虞氏宗堯亦以功德而宗之也國語注曰虞以上尚德是也

金氏履祥曰史稱黃帝之曾孫嚳嚳之子堯則堯黃
帝之元孫也又稱黃帝生昌意昌意生顓頊歷窮蟬
敬康勾芒螭牛以至瞽瞍而生舜則舜黃帝八世孫
也世系之傳史記之失考也或曰世本也朱子謂世
本或出于附會假托不可憑據今以其敘舜之世推
之其不可憑也審矣曰然則舜果何出乎考之于書
曰虞舜曰嬪于虞是虞者有國之稱也參之國語史
伯之言曰成天地之大功者其子孫未嘗不章虞夏

商周是也虞幕能聽協風以成樂物生者也夏禹能
平水土以處庶類者也商契能和合五教以保于百
姓者也周棄能播殖穀疏以衣食民人者也其後皆
爲王公侯伯夫以虞幕並稷契而言則幕爲有功始
封之君虞爲有國之號而舜所自出以王天下者也
考之左氏史趙之言曰自幕至瞽瞍無違命舜重之
以明德夫自幕以至于瞽瞍則非黃帝昌意顓頊窮
蟬敬康勾芒螭牛以至瞽瞍也或曰然則昌意窮蟬

以下之說固妄矣國語不曰幕能帥顓頊乎左氏不
曰陳顓頊之族乎曰幕之出于顓頊左氏國語之說
固足徵也然謂顓頊之必出于黃帝史記之說其果
足徵乎黃帝氏歿則少昊氏作是爲五帝之首國語
稱少昊氏之衰九黎亂德顓頊受之則少昊似一代
之通稱後世始衰非少昊之世即衰也而史記于黃
帝之後不及少昊懸紀顓頊指爲黃帝之孫隔遠無
緒少昊之代何所往而黃帝之孫何其壽也莫難明

者譜牒莫易知者朝代史記序朝代尚有遺則其序
譜牒豈足信乎傳稱有虞氏禘黃帝而郊嚳祖顓頊
而宗堯何也曰此亦小戴收國語之文而又失之者
國語論禘郊祖宗皆以其有功德于民而祀之初不
論其世也故說者謂虞以上尚德夏以下親親戴氏
祭法易其前後故讀者不覺耳此朱子固嘗言之矣
無已則又決之于書乎書稱舜格于文祖即受終于
堯之廟也稱禹受命于神宗即舜宗堯之廟也其禘

黃帝其郊饗即宗堯之意云爾是以有虞子孫猶郊
堯而宗舜以天下相傳則有天下之大統焉有虞氏
受堯之天下則宗堯宗堯則禘郊堯之宗祖計堯以
前亦或有然者矣況國語固云禘郊祖宗與報爲五
則禮固有並行而不相悖者近世有爲之說者曰祖
考來格虞賓在位此有虞祭顓頊報幕以至瞽瞍之
祖考也國語所謂祖顓頊與有虞氏報焉者也禘黃
帝郊饗宗堯書所謂文祖神宗宗舜受堯之天下故宗

堯爲宗而祖堯之祖也大傳所謂帝入唐郊以丹朱爲尸者也祖顓頊報幕以至瞽瞍者一家之私親也禘郊宗堯者天下之公義也然韶之爲樂正以紹堯而得名則祖考來格者即文祖神宗之謂而虞賓在位安知非丹朱之在尸位乎況禘郊祖宗報五者各有所尊自不相厭而虞賓之位亦不相妨也

又曰有虞氏宗堯則神宗堯廟也古史稱舜之子孫乃更郊堯而宗舜此說非也當是禹郊堯而宗舜爾

三聖揖遜以天下相傳祀以爲宗以有天下之大統也自夏后氏子孫繼世以有天下商周征伐以有天下固異于是而諸儒之說亦始膠矣

朱氏鶴齡曰攝位受終于文祖巡守歸格于藝祖即位格于文祖此舜代堯守宗廟社稷爲祭主之明文也堯祔于廟舜以大義主其祭與臣工共盡享格之義此不易之理也然則如非族何曰神不歆非類民不祀非族舜與堯雖非族也非非類也聖人之德也

君臣之契也禪受之統也類莫如堯與舜也廟號神宗自官天下視之萬世之宗也堯之祀非舜主之而誰也然則于瞽瞍如何曰其生也以天下養其死也自爲虞氏之祖故曰宗廟饗之子孫保之此于堯以天下相傳之義固不相妨也禹之于鯀亦然矣然則丹朱不祀堯乎曰朱子謂堯廟當立于丹朱之國修其禮物作賓王家愚謂此商周革命之禮非舜禹禪承之禮也以經考之祖考來格虞賓在位羣后德讓

此非舜祭于廟而丹朱與有事之明徵乎祖考下繫
虞賓則考者堯也若謂舜祭其祖考而丹朱在位是
與殷之孫子侯服駿奔于周廟者同也其必不然矣
吳氏棫曰祭法必有所據舜受堯之天下今以授
禹禹其宗堯何疑唐孔氏以爲舜始祖之廟非也
王氏樵曰神宗爲堯斷然不易文祖
神宗其祖有功宗有德之所自始與

蕙田案唐虞宗廟之祭曰文祖曰藝祖曰神
宗藝祖即文祖蓋堯之始祖廟也堯之天下
受于文祖今將以授舜故攝位告即位告巡

狩告攝位即位告者明統緒之授受也巡狩告者攝政而代主宗廟之事也孔傳所云自屬不易至其人之或爲黃帝或爲顓頊史記世本所載皆不足憑故傳稱不知爲誰是亦闕疑之義惟神宗之說則傳與正義謂爲舜之始祖而蔡傳據蘇氏之說斷以爲堯廟則蔡傳是也祭法云有虞氏祖顓頊而宗堯宗堯故不稱祖而稱宗蓋統緒者天下之統緒

也受天下即受與天下者之統緒故禘郊祖宗一氣相接義之盡仁之至也祖考來格虞賓在位既稱宗即可稱考紹統者主祭來賓者助祭禮固然矣若承其統緒舍其宗廟而自立宗廟俾堯之子孫與于駿奔之列不特等于商周革命之事其與後之莽懿相去幾何孰謂大聖人而出此且豈所稱官天下者耶至中庸稱舜大孝而曰宗廟饗之子孫保

之蓋舜之宗廟享舜及舜子孫之祭無非舜之大孝也夫舜以側微受命以其一身繼天下之統而又自爲其祖考立宗廟爲其子孫立國家俾世世享其祀而弗替非大德大孝孰克爲之左傳自幕至于瞽瞍無違命國語幕能帥顓頊者也故有虞氏報焉非宗其統也報其功也此宗廟饗之也舜處其子均于商而禹復封之虞古史謂服其服禮樂如之

客見天子而不臣此子孫保之也正合國語
禘郊祖宗與報爲五之義與祭法固並行而
不悖金仁山謂祖顓頊報幕以至瞽瞍者一
家之私親也禘郊祖宗者天下之公義也朱
長孺謂堯祔于廟舜以大義主其祭廟號神
宗自官天下視之萬世之宗也于瞽瞍其生
也以天下養其死也自爲虞氏之祖其說皆
精當不可易矣

通典唐虞立五廟

蕙田案杜氏泥鄭氏所引禮緯稽命徵之說
謂唐虞立廟親廟四始祖廟一故剏爲五廟
之說非也商書七世之廟可以觀德疏謂漢
氏以來論七廟者多矣其文見于記傳者禮
器家語荀卿書穀梁傳皆曰天子立七廟以
爲天子常法舜格于文祖正義曰天子七廟
其來自遠說不可易也

國語魯語繇障洪水而殛死禹能以德修繇之功夏
后氏禘黃帝而祖顓頊郊繇而宗禹 杼能率禹者也
夏后氏報焉

禮記祭法夏后氏亦禘黃帝而郊繇祖顓頊而宗禹

趙氏匡曰夏后氏禘黃帝義同舜也郊繇者禹尊父
且以有水土之功故以配天祖顓頊者禹世系亦出
顓頊也宗禹者當禹身
亦宗舜子孫乃宗禹

呂氏大臨曰禘繇皆有惡德虞不郊禘
而夏郊繇以繇有以死勤事之功也

周氏諤曰有虞氏夏后氏既同一禪讓得天下則有
虞氏郊饗而宗堯夏后氏亦當郊饗而宗舜今于夏

后氏反謂祖顓頊而宗禹何也舜之受禪止于一世故就舜之身言之則不得不郊饗而宗堯禹之受禪傳于數世故就禹之子言之則不得不郊繇而宗禹使就舜之子言之則固當郊瞽瞍而宗舜而就禹之身言之則固當

郊饗而宗舜

又曰虞夏殷之世其禮猶質而不若周之文故所謂祖者即太祖也而爲太祖者其廟不毀于萬世而其祭常行于四時則尊而且親所謂郊者其廟不免于毀而又止祭及于園丘而已則尊而不親此虞夏殷周之世所以用其先而尊者爲祖後而卑者爲郊

蕙田案郊祀配天其禮甚大周氏以爲其廟不免于毀非也

張子曰夏郊鯀以其祖也祀之郊禹者必繫時王之命不使郊鯀祀私廟猶可也

楊氏復曰夏后氏之祖顓頊猶有虞氏也禹啟夏祚既以顓頊爲祖故夏后氏祖顓頊而宗禹至其後世子孫乃以禹爲受命之祖書曰明明我祖是也

金氏履祥曰古史謂舜宗祀堯至舜之子孫則更郊堯而宗舜此據國語及韋昭之說也舜郊嚳宗堯則禹固當郊堯而宗舜矣而乃以堯之祀歸之舜之子

孫顧自郊鯀焉何也曰此夏之末造也夫三聖以天下爲公則皆承其祀三王之子孫以天下爲家則各祖其祖舜之宗堯禹之宗舜一也舜之郊嚳禹之郊堯亦一也其郊鯀也則夏之末造也祀夏配天其諸始于少康乎于是郊堯宗舜則屬之虞思之國矣孔子曰杞之郊也禹也宋之郊也契也蓋商周存二代之後猶尊賢也尊賢則杞郊禹矣杞而郊禹則虞郊舜而唐郊堯者天子之事守也

蕙田案禘黃帝郊鯀之說詳見郊祀禘祫二
門宗舜宗禹則金氏之說是也禹之受禪同
舜則宗舜亦應如舜之宗堯國語祭法所言
皆禹子孫之事耳

觀承案唐虞官天下則舜受堯統自當郊饗
而宗堯矣三代家天下則禹受舜禪雖當郊
禘而宗舜至其子啟賢而繼立固宜以郊禘
宗舜者歸之商均之國而夏自宜郊鯀而宗

禹耳金仁山之說極當但必以爲祀夏配天
始於少康則亦未見其果然否也然立說自
穩

通典夏氏五廟

蕙田案通典據鄭注之說其謬與唐虞五廟
同天子之制皆七廟也

書咸有一德七世之廟可以觀德

傳天子立七廟有德之主則爲祖宗其廟

不毀故可觀德王則列爲祖宗雖七世親盡而其廟不毀故于七廟之

疏天子立七廟是其常事其有德之

外可以觀德下云萬夫之長可以觀政謂觀其萬夫之
長此七世之廟可以觀德謂觀七世之外文雖同而義
小異所謂辭不害意漢氏以來論七廟者多矣其文見
于紀傳者禮器家語荀卿書穀梁傳皆曰天子立七廟
以爲天子常法不辨其廟之名王制云天子七廟三昭
三穆與太祖之廟而七祭法云王立七廟考王考皇考
顯考祖考廟皆月祭之遠廟爲祧有二祧享嘗乃止漢
書韋玄成議曰周之所以七廟者周后稷始封文武受
命而王是以三廟不毀與親廟四而七也鄭玄用此爲
說唯周有七廟二祧爲文武故鄭玄王制注云此周制
七廟者太祖及文武二祧與親廟四太祖后稷也殷則
六廟契及湯與二昭二穆良由不見古文故爲此謬說
商書已云七世之廟則天子立七廟王者常禮非獨周
人始有也劉歆馬融王肅雖不見古文皆以七廟爲天
子常禮所言二祧者王肅以爲高祖之父
及祖也并高祖以下共爲三昭三穆耳

詩烈祖疏禮王者祖有功宗有德不毀其廟故異義
詩魯說丞相匡衡以爲殷中宗周成宣王皆以時毀
古文尚書說經稱中宗明其廟宗而不毀謹案春秋
公羊御史大夫貢禹說王者宗有德廟不毀宗而復
毀非尊德之義鄭從而不駁明亦以爲不毀也則非
徒六廟而已鄭言殷六廟者據其正者而言也禮稽
命徵曰殷五廟至于子孫六注云契爲始祖湯爲受
命王各立其廟與親廟四故六鄭據之以爲殷立六
廟至于中興之主有德則宗既
無常數故鄭不數二宗之廟也

蔡傳天子七廟三昭三穆與太祖之廟七七廟親盡
則遷必有德之主則不祧毀故曰七世之廟可以觀
德

孫氏炎曰天子祖有功而宗有德故雖七世而其廟不毀七廟者漢世以來論之多矣鄭康成謂夏五廟無太祖禹二昭二穆殷六廟契與湯及二昭二穆周則七廟后稷爲始祖文武受命而王三廟不毀與二昭二穆此說妄也天子七廟之制久矣

蕙田案注疏謂天子立七廟是其常事是也鄭氏乃有殷六廟之說昔人已闢其謬但注疏七世之廟可以觀德謂觀七世之外專以有德不祧毀者言云與萬夫之長可以觀政文雖同而義小異所謂辭不害意蔡氏因之

今案七世之廟可以觀德萬夫之長可以觀
政文義一串謂承七世之廟而爲天子有德
則存無德則亡故曰可以觀德爲萬夫之長
而出政政善則安政壞則危故曰可以觀政
緊承上文克綏先王之祿二句言似更直截
且以見七廟爲天子定制也蓋人君既爲天
子則上承七廟之重宗社所係其可懼爲何
如若云觀于七廟外之有德者言太祖見居

七廟中寧無德可觀且詎不嫌于譏七廟爲
無德耶德字當主人主言不宜指祖宗言注
疏似稍迂曲故又有文同義異之說

國語魯語契爲司徒而民輯寔勤其官而水死 商人

禘饗而祖契郊寔而宗湯 上甲微能帥契者也商人

報焉

鄭注殷宜郊契 疏殷人宜郊契者今虞先云郊
饗後云祖顓頊夏先云郊鯀後云祖顓頊殷先云

郊寔後云祖契是在前者居
後在後者居前故云宜也

趙氏匡曰殷祖契出自饗故禘饗寔有水功故郊寔

以配天湯出契後故祖契宗湯者當湯身未嘗有宗也

楊氏復曰殷祖于契契母曰簡狄有戎氏之女爲帝
嚳次妃吞玄鳥而生契帝嚳者契之所自出故殷人
禘嚳于契之廟而以契配之也殷人郊冥者冥契六
世孫也冥勤其官而水死祭法推其功烈至于先聖
王並稱故殷人以冥配天也殷人祖契而宗湯者湯
革夏命爲殷之祖然殷之功始于契故殷人祖契而

宗湯後世子孫乃以湯爲受命之祖詩曰衎我烈祖是也又其後殷有三宗祖甲曰太宗太戊曰中宗武丁曰高宗亦有德而可宗周公作無逸舉殷三宗以戒成王然則三宗亦爲不毀之廟也

何氏楷曰孔叢子論書篇云維高宗報上甲微定公問曰此何謂也孔子對曰此謂親盡廟毀有功而不及祖有德而不及宗故于每歲之大嘗而報祭焉案竹書夏帝桀三十三年商侯遷于殷帝泄十二年殷

侯子亥賓于有易有易殺而放之十六年殷侯微以
河伯之師伐有易殺其君綿臣至殷武丁十二年報
祀上甲微季本云相土生昌若昌若生曹圉曹圉生
冥竹書載夏少康十一年使商侯冥治河至帝杼十
三年商侯冥死于河中間計三十四年魯語及祭法
所謂冥勤其官而水死者冥生振竹書以爲殷侯子
亥蓋振名而子亥其字也實始遷殷計三十七年而
爲有易之君綿臣所殺國統幾絕振生微字上甲乃

殺綿臣而以殷興仍居殷地是則殷之遷雖在子亥而昌殷緒以基王業者乃在上甲故殷人報之也皇甫謐謂微字上甲其母以甲日生故也商家生子以日爲名蓋自微始白虎通亦云殷道尚質故直以生日名子而譙周則謂死稱廟主曰甲蓋謂生稱其名死則以其生之名爲廟主也于理或然

詩商頌那衍我烈祖

傳烈祖湯有功烈之祖也箋烈祖湯也

詩序那祀成湯也

箋正義序稱祀成湯則經之所陳是祀湯之事不宜爲湯之祀祖

商頌烈祖嗟嗟烈祖

箋我功烈之祖成湯

詩序烈祖祀中宗也

箋中宗殷王大戊湯之玄孫也有桑穀之異懼而修德殷道復興故

表顯之號

爲中宗

商頌玄鳥受命不殆在武丁孫子

傳武丁高宗也

詩序玄鳥祀高宗也

箋祀當爲裕裕合也高宗殷王武丁中宗玄孫之孫也有雉雉之異

又懼而修德殷道復興故亦表顯之號爲高宗云崩而始合祭于契之廟歌是詩焉正義知此祀當爲裕者

以經之所陳乃上述玄鳥生商及成湯受命若是四時常祀不應遠頌上祖殷武與此皆云祀殷武所陳高宗身祀而已則知此與彼殊宜當爲裕也案殷本紀大戊生仲丁及外壬及河亶甲亶甲生祖乙祖乙生祖辛祖

辛生祖丁祖丁生陽甲及盤庚及小辛及小乙小乙生武丁是武丁爲大戊玄孫之孫書序云高宗祭成湯有飛雉升鼎耳而雉作高宗彤日殷本紀稱武丁見雉升鼎耳懼而修政行德天下咸懼殷道復興立其廟爲高宗

商頌長發玄王桓發

傳玄王契也之始祖故亦以王言之也

帝命不違至于湯齊

箋帝命不違者天之所以命契之事世世行之其德寢大至于湯而

當天心

詩序長發大禘也

朱子集傳序以此爲大禘之詩蓋祭其祖之所自出

而以始祖配也蘇氏曰大禘之祭所及者遠故其詩
歷言商之先后又及其卿士伊尹蓋與祭于禘者也
商書曰茲予大享于先王爾祖其從與享之是禮也
豈其起于商之世與今案大禘不及羣廟之主此宜
爲禘祭之詩然經無明文不可考也

何氏楷曰此詩末章舉及阿衡正配享太廟之事固
大禘之一証也書盤庚篇茲予大享于先王爾祖其
從與享之周禮司尊彝云凡四時之間祀追享朝享

先儒謂禘追其所自出故爲追享祫羣廟主皆朝于太廟故爲朝享禘祫皆以享名而禘尤大于祫故以大享名也盤庚言功臣配享正在大享之時則序以長發爲大禘信非妄矣何休亦云禘所以異于祫者功臣皆祭也

蕙田案序以爲大禘朱子謂禘不當及羣廟之主王安石曰雖序禘太祖周無四時之禘故也此序曰大禘則商有四時之禘故也四

時之禘爲小則禘其祖之所自出爲大何元
子曰禘之名義有三一曰時禘一曰吉禘一
曰大禘時禘之名至周而改今考周宗廟之
禘惟有一祭時禘的是殷禮而大禘之兼及
羣廟及配享功臣亦與周不同盤庚云大享
于先王爾祖其從與享者或亦殷時大禘之
制與然其爲宗廟之祭不可易也

宗元案大禘對時禘言是也猶之大禘對時

祫言也若因追享爲大禘而即以大禘爲大
享則未確夫享莫尊于禘而莫大于祫禘惟
太祖一人所以尊之又追其所自出之帝故
謂之追享特以對時禘及吉禘言而謂之大
禘不可因大禘而謂之大享也惟三年之祫
徧及羣廟毀廟而元功之臣亦配享焉但不
及所出之帝然其禮最爲周徧而廣闊故對
時祫言既謂之大祫又對追享言而謂之大

享也亦謂之朝享者正是功臣亦在而同朝
于太祖也考長發之詩中及相土毀廟之主
并及伊尹之元功即所謂大享于先王爾祖
其從與享者正是大禘之祭而謂之大享者
也小序謂大禘者非朱子已曾駁正之集傳
雖未質言要已發其疑矣何元子信序而曲
証爲大享即大禘者欲以強詞軋正理實不
足取也夫自漢儒以來多以大禘爲合祭羣

廟惟趙伯循因大傳只云以其祖配之而無
合食于前之文故謂禘其始祖所自出者配
惟始祖一人而不及羣廟此不刊之論也蓋
古祭各于其廟惟時祫大祫乃合食于太廟
故謂之祫耳若禘郊宗祖之祭尤典禮之特
隆者而可以羣廟之主雜于其間乎朱子獨
從趙氏說洵至當不易矣說此詩者又因序
有大禘之語反謂大禘原及羣廟以遷就之

何其惑也又或以爲商周之禮不同亦未免
從而爲之詞耳夫周公所損益者不過制度
文爲之末若禘郊宗祖之祭乃享帝享親之
極盛正所謂殷因於夏禮周因於殷禮者而
可假商周異制之說以巧爲解乎則序說洵
爲無稽而不足据也審矣

商頌殷武捷彼殷武

傳殷武殷王武丁也

詩序殷武祀高宗也

正義高宗前世殷道中衰高宗伐荆楚修宮室子孫美之詩人追述

其功而
歌此詩

朱子曰高宗中興特爲百世不遷之廟不在三昭三穆之列此詩則廟成始祔而祭之詩也

劉氏瑾曰高宗七世親盡而立
廟此詩其作于帝乙之世與

劉氏歆曰天子七廟七者其正法數可常數者也宗不在數中宗變也于有功德則宗之不可預爲設數故于殷太甲爲太宗大戊爲中宗武丁爲高宗由是言之宗無數也或言天子五廟無見文或言中宗高宗者宗其道而毀其廟則名與實異非尊德貴功之意也

朱子曰劉歆說文武爲宗不在七廟數中此說是又

曰商之三宗若不是別立廟只是親廟時何不胡亂將三箇來立如何恰限取祖甲太戊高宗爲之那箇祖有功宗有德天下後世自有公論不以揀擇為嫌所以名之曰幽厲雖孝子慈孫百世不能改那箇好的自是合當宗祀如何毀得如今若道三宗只是親廟則是少了一箇親廟了

何氏楷曰武丁雖自立廟然當世數未盡時必仍居七廟中及夫親盡應毀之日乃始遷其主于新廟與

七廟同享祀爲百世不遷之宗而不與羣祧等列耳
又案先儒謂遠廟爲祧遷主藏焉劉公瑾云三宗之
廟未知立于何所竊意中宗當穆高宗祖甲當昭各
隨昭穆之位特立其廟于太祖廟之兩旁三昭三穆
之上如周文武世室之謂也

周氏世樟曰從來稱殷有三宗而不數成湯于理未
安然國語及祭法皆言殷人祖契而宗湯則湯固殷
宗不獨三也據商頌則湯實稱祖故賀循云
殷有二祖三宗然則殷之特廟蓋有四矣

蕙田案七廟之制自虞至商已然殷之三宗

百世不毀不在七世親廟之數劉歆之論不可易也故朱子亦以爲是

書武成丁未祀于周廟駿奔走執豆籩

傳四月丁未祭告后稷以下文

考文王以上七世之祖駿大也諸侯皆大奔走于廟執事疏知告后稷以下后稷則始祖以下容毀廟也天

子七廟故云文考文王以上七世之祖見是周廟皆祭之故經總云周廟也

禮記大傳牧之野武王之大事也既畢而退設奠于牧

室遂率天下諸侯執豆籩逡奔走追王太王王季王季

歷文王昌不以卑臨尊也

疏此論武王伐紂率領諸侯以祭祖廟追王太王王季上

尊祖稱之事率領天下諸侯在廟祭先祖乃追王太王
王季文王等爲王不以諸侯之卑號臨天子之尊也

書經洛誥戊辰王在新邑烝祭歲王入太室裸疏太室
室之大

者故爲清廟廟有五室中央曰太
室王肅云太室清廟中央之室

通鑑前編成王七年王至新邑十有二月烝于文武

書召誥疏洛誥云王在新邑烝祭王入太室裸則洛

邑亦立宗廟

詩周頌清廟於穆清廟

序清廟祀文王也周公既成洛邑朝諸侯率以祀文

王焉

箋清廟者祭有清明之德者之宮也謂祭文王也天德清明文王象焉故祭之而歌此詩也廟

之言貌也死者精神不可得而見但以生時之居立宮室象貌爲之耳成洛邑居攝五年時疏此解文王神之所居稱爲清廟之意文王之神有清明之德者文王能象天清明故謂其廟爲清廟賈逵左傳注云肅然清靜謂之清廟鄭不然者以書傳說清廟之義云於穆清廟周公升歌文王之功烈德澤尊在廟中嘗見文王者愀然如復見文王說清廟而言功德則清是功德之名非清靜之義也廟者人所不居雖非文王孰不清靜何獨文王之廟顯清靜之名以此故不從賈氏之說也言祭之而歌此詩者謂周公之時詩人述之而作此清廟之詩既作之後其祭皆升堂歌之以爲常曲故禮記每云升歌清廟是其事也立宮室象貌而爲之者言死者之宗廟象生時之宮室容貌故冬官匠人所論宗廟及路寢皆制如明堂

是死之宗廟猶生之路寢故云象貌爲之由此而言
自天子至于卿士得立廟者其制皆如生居之宮矣

劉歆歷譜惟四月既旁生霸粵六日庚戌武王燎于

周廟翼日辛亥祀于天位粵五日乙卯乃以庶國祀

馘于周廟

注今文尚書

禮記祭法周人禘饗而郊稷祖文王而宗武王

王制天子七廟三昭三穆與太祖之廟而七

注此周制七者太祖

及文王武王之祧與親廟四太祖后稷殷則六廟契及
湯與二昭二穆夏則五廟無太祖禹與二昭二穆而已

正義鄭氏之意天子立七廟惟謂周也鄭必知然者
案禮緯稽命徵云唐虞五廟親廟四始祖廟一夏四廟

至子孫五殷五廟至子孫六鉤命決云唐堯五廟親廟
四與始祖五禹四廟至子孫五殷五廟至子孫六周六
廟至子孫七鄭據此爲說故謂七廟周制也周所以七
者以文王武王受命其廟不毀以爲二祧并始祖后稷
及高祖以下親廟四故爲七也若王肅則以爲天子七
廟者謂高祖之父及高祖之祖廟爲二祧并始祖及親
廟四爲七故聖證論肅難鄭云周之文武受命之王不
遷之廟權禮所施非常廟之數殷之三宗宗其德而存
其廟亦不以爲數凡七廟者皆不稱周室禮器云有以
多爲貴者天子七廟孫卿云有天下者事七世又云自
上以下降殺以兩今使天子諸侯立廟並親廟四而止
則君臣同制尊卑不別名位不同禮亦異數況其君臣
乎又祭法云王下祭殤五及五世來孫則下及無親之
孫而祭上不及無親之祖不亦詭哉穀梁傳云天子七
廟諸侯五家語云子羔問尊卑立廟制孔子云禮天子
立七廟諸侯立五廟大夫立三廟又云遠廟爲祧有二

桃焉又儒者難鄭云祭法遠廟爲桃鄭注周禮云遷主所藏曰祧違經正文鄭又云先公之遷主藏于后稷之廟先王之遷主藏于文武之廟便有三桃何得祭法云有二桃難鄭之義凡有數條大略如此不能具載鄭必謂天子七廟惟周制者馬昭難王義云案喪服小記者立四廟又引禮緯夏無太祖宗禹而已則五廟殷人祖契而宗湯則六廟周尊后稷宗文王武王則七廟自夏及周少不減五多不過七禮器云周旅酬六尸一人發爵則周七尸七廟明矣今使文武不在七數既不同祭又不享嘗豈禮也哉故漢侍中盧植說文云二祧謂文武曾子問當七廟無虛主禮器天子七廟堂七尺王制七廟盧植云皆據周言也穀梁傳天子七廟尹更始說天子七廟據周也漢書韋玄成四十八人議皆云周以后稷始封文武受命石渠論白虎通云周以后稷文武特七廟又張融謹案周禮守祧職奄八人女祧每廟二人自太祖以下與文武及親廟四用七人姜嫄用一

人適盡若除文武則奄少二人曾子問孔子說周事而云七廟無虛主若王肅數高祖之父高祖之祖廟與文武而九主當有九孔子何云七廟無虛主乎故云以周禮孔子之言爲本穀梁說及小記爲枝葉韋玄成石渠論白虎通爲證驗七廟斥言玄說爲長是融申鄭之意且天子七廟者有其人則七無其人則五若諸侯廟制雖有其人不得過五則此天子諸侯七五之異也王肅云君臣同制尊卑不別其義非也又王下祭殤五者非是別立殤廟七廟外親盡之祖祫猶當祀之而王肅云下祭無親之孫上不及無親之祖又非通論且家語云先儒以爲肅之所作未足可依案周禮惟存后稷之廟不毀案昭七年傳云余敢忘高圉亞圉注云周人不毀其廟報祭之似高圉亞圉廟亦不毀者此是不合鄭說故馬融說云周人所報而不立廟

蕙田案天子七廟之制諸儒多言自虞夏以

來惟鄭氏據禮緯有虞夏五廟殷六廟周七
廟之說王肅著聖證論以非之當矣而孔疏
又引馬昭難王義以附會鄭注遂啟後人之
疑然王說之是後多信之至馬說之謬尚未
有奪其所據而詳辨之者今案馬昭引喪服
小記王者立四廟爲証夫諸侯立四親廟天
子無四廟之禮方性夫謂以月祭之親廟言
之徐伯魯云天子七廟并二世室而九豈有

止立五廟之理方氏之言理或有之而劉原
父則云此一句上有脫簡吳幼清從之謂而
立四廟四字無所系屬義不可通劉氏謂當
曰諸侯及其太祖而立四廟案大傳以其祖
配之之下有此六字劉氏所謂有關文者是
也今以大傳補之言諸侯不得如天子之追
禘太祖以上所祭上及太祖而止耳而太祖
之下則立二昭二穆之廟爲四親廟也此說

似有據而可從則喪服小記所云固不得爲王者立四廟之証矣馬昭又引禮器周旅酬六尸一人發爵則七尸爲証案宗廟以七爲正數則七廟七尸自無疑義乃謂文武不在七數既不同祭又不享嘗爲無是禮案商書云七世之廟可以觀德周因殷禮自開國已然是時文武正在七廟之數至兩世室當立在懿王孝王之世何得以祭法所云強入之

懿孝之後而謂文武不在七數耶其爲穿鑿附會明矣馬昭又引曾子問七廟無虛主及周禮守祧奄八人爲証案七廟無虛主是孔子特明齋車必載祧主而言正足爲七廟之証乃謂周以后稷文武特七廟是其說固不可通于文武見居七廟之時即懿孝以後文武有功德親盡不祧而所立者世室也非廟也不曰廟而曰世室正以廟數不能減于七

亦不能加于七耳如以功德之祖而充七廟之數是仍在祧遷之列何必又創爲世室之名且與不毀之義大不相符矣寧不謂之謬說乎周禮守祧奄八人鄭謂太祖之廟及三昭三穆孔疏天子七廟通姜嫄爲八廟廟一人故八人乃謂若除文武則奄少二人陳祥道云是不知周公制禮之時文武尚爲近廟其所以宗之之禮特起于後代也果所以宗

之者在七廟內使繼世祖先功德不下文武
復在可宗之列則親廟又益殺于理必不然
真足以破其蔽矣馬昭又稱天子七廟有其
人則七無其人則五案七廟除太祖外三昭
三穆皆親也諸侯及其高祖天子益二廟以
昭尊卑之分所云降殺以兩不可易也乃强
以功德不遷之祖入于親廟之數而造爲有
其人無其人之說即無功德之祖豈無高祖

之父祖耶彌見其說之誣耳又云七廟外親
盡之祖禘祫猶當祀之夫禘非合食不及羣
廟何有毀廟牽連言之混而無別夫七廟之
議王肅爲是疏既引之而又必舉馬昭之難
以牽合者此疏家之陋例適足以益鄭氏之
過而啟千萬世紛紛之議耳

曾子問七廟五廟無虛主

禮器禮有以多爲貴者天子七廟

春秋僖公十有五年穀梁傳天子至于士皆有廟天子
七廟故德厚者流光

家語衛將軍文子將立先君之廟于其家使子羔訪
於孔子孔子曰公廟設于私家非古禮之所及天子
七廟自虞至周所不變也

荀子禮論篇有天下者事七世

袁準正論禮天子七廟左昭右穆又有祖宗不在數
中

晉書禮志周制七廟以辯宗祧

虞喜曰七廟不始于周伊尹已言矣

唐會要岑文本云載籍紀七廟者多稱四廟者寡穀梁王制祭法禮器書咸有一德並云七廟荀卿孔安國劉歆班彪父子孔晁虞喜干寶之徒咸以爲然祖鄭玄者陳四廟之制述王肅者引七廟之文

通典杜氏曰禮有以多爲貴王制云天子七廟諸侯五廟祭法云遠廟爲祧有二祧焉享嘗乃止而鄭玄以文武之廟曰祧不亦疎乎若以天子之祖功德則

不立二祧二祧不廟數與諸侯同何以爲隆殺哉虞
喜云七廟不始于周伊尹已言七世之廟矣成王六
年制禮七廟亦已有見數文王爲祖武王爲禰祖非
遠廟也周官掌宗廟而職曰守祧周公不稱祖禰爲
遠祧也當須逆數成然後廟得別出不可于成王之
代以文武逆云爲遷主所藏矣

王氏應麟曰書咸有一德七世之廟可以觀德疏有
德之王則列爲祖宗雖七廟親盡而其廟不毀漢氏

以來論七廟者多矣其文見于記傳者禮器家語荀卿書穀梁傳皆曰天子立七廟以爲天子常法

方氏慤曰天子之廟止于七何也太祖之廟創業之所始萬世所不遷也而昭穆則合而爲六者蓋四世其服已窮矣然猶總也五世同姓已殺矣然猶免也至于六世然後親屬絕故止于三昭三穆與太祖之廟而七也

馬氏晞孟曰自上以下降殺以兩禮也故天子七廟

至士一廟合于降殺以兩之意也祖以功建故無可毀之禮而有百世不遷者也昭穆以親象故有可毀之禮親盡則有祧說者以爲周則七廟夏則五廟殷則六廟蓋非是也

陳氏祥道曰積厚者流澤廣積薄者流澤狹故天子七廟諸侯五廟大夫三廟士一廟廟而祭之仁之至也以七以五以三以一義之盡也舜之時禋于六宗與藝祖而七商書七世之廟可以觀德則七廟之制

其來尚矣先王之于死者常待之以生由士而上生而異宮死則爲之立廟庶人則生非異宮死則祭于寢而已

陳氏禮書廟所以象生之有朝也寢所以象生之有寢也建之觀門之內不敢遠其親也位之觀門之左不忍死其親也家語曰天子七廟諸侯五廟自虞至周之所不變也是故虞書禋于六宗以見太祖周官守祧八人以兼姜嫄之宮則虞周七廟可知矣伊尹

言七世之廟商禮也禮記荀卿穀梁皆言天子七廟不特周制也則自虞至周七廟又可知矣然存親立廟親親之至恩祖功宗德尊尊之大義古之人思其人而愛其樹尊其人則敬其位況廟乎法施于民則祀之以勞定國則祀之況祖宗乎于是禮以義起而商之三宗周之文武漢之孝文孝武唐之神堯文皇其廟皆在三昭三穆之外歷世不毀此所謂不遷之廟非謂祧也鄭康成之徒以喪服小記言王者立四

廟則謂周制七廟文武爲二祧親廟四而已則文武
不遷之廟在七廟內是臆說也王肅聖證論曰禮自
上以下降殺以兩使天子諸侯皆親廟四則是君臣
同等尊卑不別也又王祭殤五而下及無親之孫上
不及無親之祖不亦詭哉王舜劉歆論之于漢韓退
之論之于唐皆與肅同蓋理之所在者無異致也

辨韋玄成天子五廟

漢書韋玄成傳禮王者始受命諸侯始封之君皆爲
太祖以下五廟而迭毀毀廟之主藏乎太祖五年而

再殷祭言一禘一祫也祫祭者殷廟與未毀之主皆合食于太祖父爲昭子爲穆孫復爲昭古之正禮也祭義曰王者禘其祖自出以其祖配而不爲立廟親盡也立始受命而王祭天以其祖配而不爲立廟親盡也立親廟四親親也親盡而迭毀親疎之殺示有終也周之所以有七廟者以后稷始封文王武王受命而王是以三廟不毀與親廟四而七非有后稷始封文武受命之功者皆當親盡而毀成王成二聖之業制禮作樂功德茂盛廟猶不世以行爲謚而已又曰祖宗之廟世世不毀繼祖而下五世而迭毀

劉歆議曰禮記王制及春秋穀梁傳天子七廟諸侯五大夫三士二天子七日而殯七月而葬諸侯五日而殯五月而葬此喪事尊卑之序也與廟數相應其

文曰天子三昭三穆與太祖之廟而七諸侯二昭二穆與太祖之廟而五故德厚者流光德薄者流卑春秋左氏傳曰名位不同禮亦異數自上以下降殺以兩禮也七者其正法數可常數者也宗不在此數中宗變也苟有功德則宗之不可預爲設數故于殷太甲爲太宗太戊爲中宗武丁爲高宗周公爲毋逸之戒舉殷三宗以勸成王由是言之宗無數也然則所以勸帝者之功德博矣或說天子五廟無見文或言

中宗高宗者宗其道而毀其廟則名與實異非尊德貴功之意也

朱子或問天子之廟其制若何曰唐之文祖虞之神宗殷之七世三宗其詳今不可考獨周制猶有可言然而漢儒之說又有不同矣謂后稷始封文武受命而王故三廟不毀與親廟四而七者諸儒之說也謂三昭三穆與太祖之廟而七文武爲宗不在數中者劉歆之說也雖其數之不同然其位置遷次宜亦與

諸侯之廟無甚異者但如諸儒之說則武王初有天下之時后稷爲太祖而祖紺居昭之北廟太王居穆之北廟王季居昭之南廟文王居穆之南廟猶爲五廟而已至成王時則祖紺祧王季遷而武王祔至康王時則王季祧武王遷而康王祔自此以上亦皆且爲五廟而祧者藏于太祖之廟至穆王時則文王親盡當祧而以有功當宗故別立一廟于西北而謂之文世室于是成王遷昭王祔而爲六廟矣至其王時

則武王親盡當祧而亦以有功當宗故別立一廟于東北謂之武世室于是康王遷穆王祔而爲七廟矣自是以後則穆之祧者藏于文世室昭之祧者藏于武世室而不復藏于太廟矣如劉歆之說則周自武王克殷即增立二廟于二昭二穆之上以祀高圉亞圉始前遞遷至于懿王而始立文世室于三穆之上至孝王時始立武世室于三昭之上此爲少不同耳曰然則諸儒與劉歆之說孰爲是曰前代儒者多是

劉歆愚亦意其或然也

祧廟議曰天子七廟宗者不在數中此爲禮之正法宗者在數中禮之末失也

陳氏澂曰王立七廟而以文武不遷之廟足其數則其實五廟而已若商有三宗則將爲四廟乎然則朱子然劉歆之說豈無見乎

蕙田案韋玄成論天子七廟實止五廟今核其說乃實止四廟耳玄成曰王者禘其祖自

出以其祖配而立四廟言始受命而王祭
天以其祖配而不爲立廟親盡也此其說有
數悞小記而立四廟句上有闕文劉原父吳
草廬之說甚明玄成他無所據而引此闕文
爲據一悞指立四廟爲王者之禮雖有配天
之祖亦不得立廟則天子止得四廟此諸侯
反殺其一二悞禮莫大于配天既祭天以祖
配矣而仍不爲祖立廟豈宗廟之禮反隆于

配天之禮而乃斬之耶三悞配天以功德不限定五世之祖而曰不爲立廟親盡也四悞小記之文本言禘祭太祖所自出而以太祖配之如商禘饗而契配周禘饗而稷配耳與祭天配天何與而乃以禘爲祭天以配爲配天五悞若夫功德之廟不可預爲設數使文武而下復有可宗之人親廟慮又益殺劉歆之論足以正韋之失矣

右四代七廟之制

周禮考工記匠人夏后氏世室

注世室者宗廟也魯廟有世室此用先王之禮

疏鄭云此用先王之禮者世室用此經夏法是用先王之禮也

蕙田案世室之名始此

禮記明堂位魯公之廟文世室也武公之廟武世室也

注此二廟象周有文王武王之廟也世室者不毀之名也疏此一經明魯有二廟不毀象周之文武二祧也

任氏啟運曰文武之不遷謂之世室魯以二公比之也

蕙田案文世室武世室之名見于此

春秋文公十三年世室屋壞穀梁傳世室者何

疏解云欲言君

寢于側不書欲言宗廟未

有世室之名故執不知問魯公之廟也周公稱太廟魯

公稱世室羣公稱宮此魯公之廟也

注魯公周公子伯禽

曷爲謂

之世室世室猶世室也世世不毀也

疏言謂之世室者猶世世室也

世

室屋壞何以書譏何譏爾久不修也

朱子禘祫議天子太祖百世不遷一昭一穆爲宗亦

百世不遷宗亦曰世室亦曰祧鄭注周禮守祧曰宗

亦曰祧亦曰世室周禮言守祧之宮鄭氏曰遠廟爲

祧周爲文武之廟遷主藏焉又曰遷主所藏曰祧先公之遷主藏于太祖后稷之廟先王之遷主藏于文武之廟羣穆于文羣昭于武明堂位有文世室武世室鄭氏曰世室者不毀之名也

又曰周穆王時文王親盡當祧而以有功當宗故別立一廟于西北而謂之文世室其王時武王親盡當祧而亦以有功當宗故別立一廟于東北而謂之武世室

陳氏禮書父昭子穆而有常數者禮也祖功宗德而無定法者義也故周于三昭三穆之外而有文武之廟魯于二昭二穆之外而有魯公之世室觀春秋傳稱襄王致文武胙于齊侯史記稱顯王致文武胙于秦孝公方是時文武固已遠矣襄王顯王猶且祀之則其廟不毀可知矣家語左傳稱孔子在陳聞魯廟火曰其桓僖乎以爲桓僖親盡無大功德而魯不毀故天裁之其言雖涉于怪而理或有焉若然則魯公

之室在所不毀可知矣王舜中劉歆王肅韓退之之徒皆謂天子祖功宗德之廟不在七世之列特鄭康成以周禮守祧有八人小記王者立四廟則謂周制七廟文武爲二祧親廟四而已是不知周公制禮之時文武尚爲近廟其所以宗之之禮特起于後代也果所以宗之者在七廟內使繼世祖先間有豐功盛德不下文武復在可宗之列則親廟又益殺乎理必不然

錢氏梅仙曰天子之廟七不可益亦不可損所謂七廟者高曾祖考親廟四五世六世祧廟二始祖之廟一孔子所謂自虞至周之所不變者此制是也獨有功德之主親盡不遷故周立文武世室不曰廟而曰世室亦以廟制不能加于七耳或謂周立九廟如九廟可立何必又爲世室之名哉劉歆謂七者正數其常也宗不在此數中宗變也在殷則成湯而下爲中宗高宗祖甲在周則爲文武苟有功德則宗之不可

預爲設數也至于二祧廟爲五世六世祖即王肅所謂高祖之父高祖之祖也而韋玄成之徒則云王立七廟者親四始祖一文武不遷合爲七此大謬之說也蓋文武在共王時猶在七廟之內至懿王孝王別立二世室則在七廟之外左傳載景王之言曰予敢忘高圉亞圉朱子謂武王克商增立二祧于二昭二穆之上祀高圉亞圉則七廟之立自武王時已然如合世室而始足七廟之數是周止五廟矣豈周家制

禮竟下同于諸侯之制乎必不然矣

辨諸家立虛廟

王制孔疏天子七廟有其人則七無其人則五
啟運曰世室二廟有其人則實之無其人則虛之馬
昭引禮緯云唐虞五廟夏初四廟子孫宗禹而五殷
初祖契與親廟而五子孫宗湯而六周初五廟子孫
宗文武而七是有虛廟之明証也如魯公始封周公
尚在王季文王不得祀于諸侯之廟是五廟皆虛也
烏得謂無
虛廟乎

孔穎達曰凡始封之君謂王之子弟封爲諸侯爲後
世之太祖當此君之身不得立王之廟則全無廟也

故諸侯不敢祖天子始封之子得立一廟始封六世之孫始五廟備也

朱子曰如劉歆之說周自武王克殷即增立二廟于二昭二穆之上以祀高圉亞圉如前遞遷至于懿王而始立文世室于三穆之上至孝王時始立武世室于三昭之上

辨趙德周無文武兩世室

趙氏德曰文世室武世室蓋本于禮記明堂位之言魯公之廟文世室也武公之廟武世室也鄭注此二

廟象周有文王武王之廟也世室者不毀之名魯公伯禽也武公伯禽之玄孫名穀疏云文世室者魯公伯禽有文德世世不毀其室故云文世室武世室者伯禽玄孫武公有武德其廟亦不毀故云武世室案記禮者之意謂周有文王世室武王世室成王賜魯以天子禮樂故魯有伯禽及武公之廟得以象文王武王不毀之廟也後儒因明堂位之文遂以爲周有文世室武世室也三禮辨曰武公之廟蓋已久毀成公二年季孫宿以鞶之戰有功而立之春秋書立武宮左氏公羊並譏之謂不宜立也世室屋壞左氏謂之太室公穀謂之世室武煬皆稱宮無所謂武世室也諸儒或引此以証文王武王之廟爲世室悞矣

蕙田案趙氏謂武公之廟當不得武世室可也謂周并無文武兩世室可乎春秋傳史記

載襄王顯王致文武胙于齊秦是世室不毀
之確証明堂位侈張魯禮語雖近誣而所引
四代服器官其制度名色無緣都是鑿撰古
禮之亡安知不藉此反存其一二耶

右世室

禮記祭法天下有王分地建國置都立邑設廟祧壇墀
而祭之乃爲親疎多少之數是故王立七廟一壇一墀
曰考廟曰王考廟曰皇考廟曰顯考廟曰祖考廟皆月

祭之遠廟爲祧有二祧饗嘗乃止去祧爲壇去壇爲墀
壇墀有禱焉祭之無禱乃止去墀曰鬼諸侯立五廟一
壇一墀曰考廟曰王考廟曰皇考廟皆月祭之顯考廟
祖考廟饗嘗乃止去祖爲壇去壇爲墀壇墀有禱焉祭
之無禱乃止去墀爲鬼大夫立三廟二壇曰考廟曰王
考廟曰皇考廟饗嘗乃止顯考祖考無廟有禱焉爲壇
祭之去壇爲鬼適士二廟一壇曰考廟曰王考廟饗嘗
乃止顯考無廟有禱焉爲壇祭之去壇爲鬼官師一廟

曰考廟王考無廟而祭之去王考爲鬼庶士庶人無廟

死曰鬼

注廟之言貌也宗廟者先祖之尊貌也祧之言超也超上去意也封土曰壇除地曰墠書曰三

壇同墠王皇皆君也顯明也祖始也名先人以君明始者所以尊本之意也天子遷廟之主以昭穆合藏于二祧之中諸侯無祧藏于祖考之廟中聘禮曰不腆先君之祧是謂始祖廟也饗嘗謂四時之祭天子諸侯爲壇墠祈禱謂後遷在祧者也既事則反其主于祧鬼亦在祧顧遠之于無事祫乃祭之耳春秋文二年秋大事于太廟傳曰毀廟之主陳于太祖未毀廟之主皆升合食于太祖是也魯煬公者伯禽之子也至昭公定公久已爲鬼而季氏禱之而立其宮則鬼之主在祧明矣惟天子諸侯有主禘祫大夫有祖考者亦鬼其百世不禘祫無主耳其無祖考者庶士以下鬼其王考官師鬼其皇考大夫適士鬼其顯考而已大夫祖考謂別子也凡鬼

者薦而不祭王制曰大夫士有田則祭無田則薦適士
上士也官師中士下士庶士府史之屬此適士云顯考
無廟非也當爲
皇考字之悞

方氏慤曰二祧
顯考之父祖也

馬氏晞孟曰說者謂七廟之中祧廟二則爲文武之
廟其說非也遠廟爲祧而二祧之廟止于享嘗而已
苟文武之廟而祭止享嘗亦非先王所以尊祖宗之
意也王制所謂太祖則無可毀之理此天子諸侯大
夫之廟而曰去祖爲壇則祖有可毀之理何也蓋祭
法爲無功德者言之王制爲有功德者言之此所以
不同

張氏融曰孝經爲之宗廟以鬼享之公羊毀廟之主
藏乎太祖五年而再殷祭無去祧爲壇去壇爲墠去

壇爲鬼之制祭法
所言皆衰世之法

楊氏復曰案祭法與王制不同王制天子七廟三昭三穆與太祖之廟而七祭法則序四親廟二祧太祖以辨昭穆王制諸侯五廟二昭二穆與太祖之廟而五祭法則三親廟月祭高太廟享嘗以見隆殺王制大夫三廟一昭一穆與太祖之廟而三祭法但有三親廟而無高太廟有二壇爲請禱之祭而已王制士一廟祭法分適士二廟官師一廟又祭法有考王考皇考顯考祖考之稱王制無之祭法有壇有墀或二壇無墀或一壇無墀王制無之大抵王制略而祭法詳又案三壇同墀之說出于金縢乃因有所禱而爲之非宗廟之外預爲壇墀以待他日有禱也孝經爲之宗廟以鬼享之非去壇爲鬼也晉張融謂祭法去祧爲壇去壇爲墀去墀爲鬼皆
衰世之法則所言難以盡信

陳氏浩曰案此章曰王立七廟而以文武不遷之廟爲二祧以足其數則其實五廟而已若商有三宗則爲四廟乎壇墠之主藏于祧而祭于壇墠猶之可也謂有禱則祭無禱則止則大禘升毀廟之文何用乎又宗廟之制先儒講之甚詳未有舉壇墠爲言者周公三壇同墠非此義也又諸儒以周之七廟始于共王之時夫以周公制作如此其盛而宗廟之制顧乃下同列國吾知其必不然矣然則朱子然劉歆之說豈無見乎鄭注此章謂祫乃祭之蓋亦覺記者之失矣

徐氏師曾曰去墠爲鬼則王者何以有禘乎其謬甚矣

郝氏說曰案王制天子七廟三昭三穆與太祖之廟而七天子諸侯皆有太祖無祧壇墠鬼此不言太祖泛云祖考遠廟爲祧則似世遠去太祖亦不免矣至使壇墠露處絕其血食故鄭有祫乃祭之之說以救

之實非記本意記有禱焉祭之無禱乃止未及祫也然則祭法與王制其誰爲先王之舊乎人生有貴賤孝先之情本一自官師不得與士大夫同祀其祖至于庶士庶人不幸不得爲大夫士而親死卽爲無祀之鬼諒非先王制禮之意

蕙田案祭法與王制不合諸儒多以祭法爲疑今考此條蓋本于家語而汲古閣所刊家語與葛氏本其文亦有異同則係漢儒附會理或有之今并附于後以俟參考

家語廟制衛將軍文子將立先君之廟于其家使子

羔訪于孔子子曰公廟設于私家非古禮之所及吾
弗知子羔曰敢問尊卑上下立廟之制可得而聞乎
孔子曰天下有王分地建國設祖宗乃爲親疎貴賤
多少之數是故天子立七廟三昭三穆與太祖之廟
而七近廟皆月祭之遠廟爲祧有二祧焉享嘗乃止
諸侯立五廟二昭二穆與太祖之廟而五祖考廟享
嘗乃止大夫三廟一昭一穆與太祖之廟而三享嘗
乃止士一廟曰考廟王考無廟合而享嘗乃止庶人

無廟四時祭于寢此自有虞以至于周之所不變也
凡四代帝王之所謂郊者皆以配天其所謂禘者皆
五年大祭之所及也應爲太祖者則其廟不毀不及
太祖雖在禘郊其廟則毀矣古者祖有功而宗有德
諸見祖宗者其廟皆不毀

汲古閣本

葛氏本衛將軍將立三軍之廟于其家使子羔訪于
孔子子曰公廟設于私家非古禮之所及吾弗知子
羔曰敢問尊卑上下立廟之制可得而聞乎孔子曰
天下有王分地建國置都立邑設廟祧壇墀而祭之
乃爲親踈多少之數是故天子立七廟三昭三穆與
太祖之廟七曰太祖有一壇有一墀曰考廟曰王考

廟曰皇考廟曰顯考廟曰祖考廟皆月祭之遠廟爲祧有二祧享嘗乃止去祧爲壇去壇爲墀壇墀有禱焉祭之無禱乃止去墀爲鬼諸侯立五廟二昭二穆與太祖之廟五曰祖考廟有一壇一墀曰考廟曰王考廟曰皇考廟皆月祭之顯考廟祖考廟享嘗乃止去祖爲壇去壇爲墀壇有禱焉祭之無禱乃止去墀爲鬼大夫立三廟一昭一穆與太祖之廟三曰皇考廟有一壇考廟月祭王考廟皇考廟爲始祖廟享嘗乃止顯考無廟有禱焉爲壇祭之去壇爲鬼適士二廟曰王考廟有一壇曰考廟曰王考廟享嘗乃止皇考無廟有禱焉爲壇祭之去壇爲鬼官師一廟曰考廟王考無廟而祭之去王考爲鬼庶人無廟四時祭于寢此自有虞以至于周之所不變也諸見祖宗作謂之祖宗

禮記喪服小記王者禘其祖之所自出以其祖配之而

立四廟庶子王亦如之

鄭注四廟高祖以下與始祖而五

方氏慤曰王立七廟三昭三穆與太祖之廟而七此言王止曰立四廟者據月祭之親廟言之也蓋遠廟爲祧有二祧享嘗乃止既言禘其祖之所自出以其祖配之則祭及其二祧可知矣此所以不言之也徐氏師曾曰案天子七廟并二世室而九豈有止立五廟之理方氏以爲此據月祭之廟言之理或然也

劉氏牧曰而立四廟云天子立四廟非也此一句上有脫簡耳當曰諸侯及其太祖而立四廟

吳氏澄曰而立四廟四字無所系屬義不可通劉氏曰此句上有缺文當曰諸侯及其太祖而立四廟案

大傳以其祖配之之下有此六字劉氏所謂有缺文者是也今從其說而以大傳篇之文補之言諸侯不得如天子之追禘太祖以上所祭上及太祖而止耳而太祖之下則立二昭二穆之廟爲四親廟也

陳氏禮書庶子王亦如之者禮爲人後者爲父母期公子爲後爲其母于子祭于孫否蓋爲人後者雖受重于所後而不廢父母期公子爲後雖受重于君母而不廢其母祭則庶子爲王雖有正統之七廟其可

輒廢祖考之祭乎于是自立四廟以視始受命而王者所以著其不忘本也昔漢宣帝以從孫繼昭帝患昭穆之體一也于是立悼皇考廟以當一代之穆而王舜中劉歆以爲孝宣以兄孫繼統爲孝昭後考廟固不當立累世奉之是兩統二父也然宣帝以悼皇考當一代之穆固不合禮若特立廟乃庶子王之所當立者謂不當立悞矣

王舜劉歆當作王莽中字衍

陸氏佃曰此言王者後世衰亂統序既絕其子孫有特起者若漢光武復有天下既復七廟則其曾祖禰

當別立廟祀之故曰庶子王亦如之也若孝文繼孝惠雖非適子其承祭祀不言可知今經言此者正爲庶子不祭庶子王然後祭耳

蕙田案立四廟徐伯魯以月祭之廟言亦屬強解劉氏吳氏脫簡之說近是且有傳之文亦不可爲無據也

附辨杜氏不毀高園亞園廟

春秋昭七年左氏傳余敢忘高園亞園杜注周人不毀其廟報祭之


孔穎達王制疏曰案周禮惟存后稷之廟不毀案昭

七年傳注似高圉亞圉廟亦不毀者此是不合鄭說故馬融說云周人所報而不立廟

辨郝敬不信七廟五廟

郝氏敬曰案七廟不見于詩書孔書云七世之廟非必真伊尹語儀禮周禮穀梁家語等書大抵與記先後雜出未可相徵或稱虞夏五廟殷六廟周七廟或云九廟以至於十二廟祭法又云適士二廟官師一廟未知誰是夫尊祖敬宗人有同心天子道隆德尊

何以思窮七世諸侯五世上不得伸情大夫祭不得
越祖禰士庶人則并王父母不祭豈人情乎



蕙田案郝氏之意以七世五世爲不足而欲
軼而過之蓋以後世世世不毀之典爲是而
魯立煬宮以諸侯而祭二十一傳之祖亦不
非也且書明言七世之廟京山自不信耳而
乃以爲不見於詩書不亦誣乎

右經傳言廟不同

五禮通考卷五十八